

東

華

錄

東華錄

臣王先謙敬

臣周瀚蕃恭校

秋七月甲辰大學士等奏松江提督高其位奏飛鴉食蝗秋禾豐茂請將原摺發鈔並宣付史館以彰嘉瑞得旨若以飛鴉食蝗爲瑞則起蝗之初得無有由乎昨發下奏摺與諸王大臣閱看者誠恐爾等體朕憂民之意不釋於懷故將蝗不成災之處令眾知之非以爲瑞也其發鈔及宣付史館俱不必行○乙巳諭直隸總督巡撫等引見月官內經朕改調人員特因地方緊要觀其人言動舉止似屬可用是以記名調用然必俟事後方可定其賢否若督撫不實心訪察而因朕一時稱許遂爾優容任其恣意行事豈朕改調之意乎再揀選命往各省人員該督撫亦不可因係揀選之

人聽其妄爲不行糾參此等人員係朕特用必當益加勉勵實心愛民方不負簡拔之意儻任意放縱有玷官箴卽當從重治罪嗣後督撫題參官內有此等官員著將原係奉旨調用或揀選命往不思報效孤負擢用之處於參本內聲明○以李永紹爲工部尚書由盛京工部侍郎遷○丙午川陝總督年羹堯奏甯夏地方向資渠水灌溉因渠隄日久失修奉旨令臣相度增築臣親至甯夏渠口中爲漢渠東爲秦渠西爲唐渠而唐渠之中向東分流者則爲我朝大清渠引水溉田不啻萬頃見在各渠尚無倒壞漫溢卽間被衝決修築甚易查甯夏設有水利都司專司修濬請俟秋收水涸查勘修理從之○丁未總理王大臣九卿科道等議覆山西布政司高成齡條奏提解火耗一疏得旨高成齡奏提解火耗一事前朕曾降諭旨令爾等平心靜氣秉公會議今觀爾等所議見識淺小與

朕意未合州縣火耗原非應有之項因通省公費各官養廉有不
得不取給於此者朕非不願天下州縣絲毫不取於民而其勢有
所不能且歷來火耗皆州縣經收而加派橫徵侵蝕國帑虧空之
數不下數百餘萬原其所由州縣徵收火耗分送上司各上司日
用之資皆取給於州縣以至耗羨之外種種餽送名色繁多故州
縣有所藉口而肆其貪婪上司有所瞻徇而曲爲容隱此從來之
積弊所當削除者也與其州縣存火耗以養上司何如上司撥火
耗以養州縣乎爾等奏稱各屬火耗請將分數酌定朕思一省之
內州縣有大小錢糧有輕重地廣糧多之州縣少加火耗已足養
廉若行之地小糧少之州縣則不能矣惟火耗不定分數儻地方
遇差多事繁之時則酌量可以濟用或是年差少事簡則耗羨卽
可量減矣又或偶遇不肖有司一時加增而遇清廉自好者自可

減除矣若酌定分數則將來竟爲成額必致有增無減此火耗分數之不可以酌定者也又奏稱提解火耗將州縣應得之項聽其如數扣存不必解而復撥等語見今州縣徵收錢糧皆百姓自封投櫃其拆封起解時同城官公同驗看耗羨與正項同解分毫不能入己州縣皆知重耗無益於己孰肯額外加徵乎是提解火耗既給上下養廉之資而且畱補虧空有益於國計若將州縣應得之數扣存於下勢必額外加增私行巧取浮於應得之數累及小民况解交督撫則顯然有據扣存州縣則難保貪廉此州縣羨餘之不可扣存者也又奏稱巡撫諾岷清勤敏幹布政司高成齡操守亦優應令二人盡心商榷先於山西一省內照所奏試行之此言尤非也天下事惟有可行與不可行兩端耳如以爲可行則可通行於天下如以爲不可行則亦不當試之於山西譬如治病漫

以醫藥試之鮮有能愈者今以山西爲試之省朕不忍也且天下撫藩豈盡不如諾岷高成齡而謂二人獨能行之乎又奏稱提解火耗非經常可久之道凡立法行政孰可歷久無弊從來有治人無治法文武之政布在方策其人存則其政舉朕有治人卽有治法法有因時制宜者譬如人有疾病因證投藥病愈卽止今提解火耗原一時權宜之計將來虧空清楚府庫充裕有司皆知自好則提解自不必行火耗亦當漸減今爾等所議爲國計乎爲民生乎不過爲州縣起見獨不思州縣有州縣之苦上司亦有上司之苦持論必當公平不可偏向又朝廷之與百姓原屬一體朝廷經費充足民間儻遇歉收可以施恩賑恤百姓自無不足之虞是清補虧空於國計民生均有益也天下督撫有如諾岷等不避嫌怨實心任事自能酌量行之通省羨餘絲毫不能隱匿又孰敢此

外多取一錢以干罪戾乎朕於臣下期望甚殷卽州縣官員亦冀其爲舉藝稷契自此各加勉勵勿侵蝕國帑勿貪剝小民各省火耗自漸輕以至於盡革此朕之願也爾等所奏與朕意不合若令再議爾等必遵朕諭議覆准行朕亦不能保其將來無弊否也各省能行聽其舉行不行者亦不必勉強可將此諭旨並爾等所議之本交存內閣○諭兵部嗣後文官在軍前效力者卽著兵部議敘永著爲例○辛亥諭總理王大臣等 皇考陵寢關繫重大若照定例止派總管等守護朕衷實切不安朕意於朕兄弟內酌令一人封以王爵子姪內二人封以公爵用代朕躬居守 山陵遂令郡王允禩前往○壬子諭戶部從前出口密雲縣南天門渡船俱令地方富戶豫備似屬擾累著停止嗣後交與通州坐糧廳每一處需用渡船幾隻照例豫備應給工費著倉場侍郎坐糧廳酌

定支給○丁巳諭諸王貝勒公文武大臣官員等朕卽位後於初御門聽政日卽面諭諸王文武大臣諄諄以朋黨爲戒今一年以來此風猶未盡除 聖祖仁皇帝亦特以朋黨訓誡廷臣俱不能仰體 聖心每分別門戶彼此傾陷分爲兩三黨各有私人一時無知之流不入於此卽入於彼朕在藩邸時敬慎獨立深以朋黨爲戒從不示恩亦無結怨設若朕當年在朋黨之內今日何顏對諸臣降此諭旨乎 皇考深知朕從無偏黨必能保全爾諸臣名節故 命朕繼承大統今日大小臣工所以安然無事得享太平之福者我 皇考之恩賜也朕平日並未樹立黨援而登踐寶位爾等亦可知朋黨之無益也夫朋友亦五倫之一往來交際原所不廢但投分相好止可施於平日至於朝廷公事則宜秉公持正不可稍涉黨援之私朕今御製朋黨論一篇頒示爾等須洗心滌

慮詳玩熟體如自信素不預朋黨者則當益加勉勵如或不能自保則當痛改前非務期君臣一德一心同好惡公是非斷不可存門戶之見卽爾等彼此亦當互相砥礪時相訓誡行事共求當理諸臣不負朕心則朕可不負 皇考付託之重朕之不負 皇考全在爾諸臣之贊成朕得爲天下之令主也諸臣不負朕朕豈忍負諸臣乎朕之用人加恩宥有未當之處或不能自信至於治人以罪無不詳慎閒有法外寬貸之處不令人知者卽下一嚴旨亦求至當從未隨意輕加呵斥此朕可自信者也如七十之惡亂舉國皆知發遣在道竟寬其械繫臨行時王大臣內多有贈遺此朋黨未消之明驗也夫朕用一人而非其黨者嫉之罰一人而是其黨者庇之使榮辱不關於賞罰則國法安在乎嗣後朋黨之習務宜盡除爾等須捫心自問不可陽奉陰違以致欺君罔上悖理違

天母謂朕恩寬大罪不加眾儻自干國法萬不能寬朕雖未必盡行誅戮然或千人之中百人百人之中十人爾等能自保不在百人十人之列乎爾等務期斷絕黨私同心輔佐盡誠極言勿使朕躬有過此朕所厚望於爾等也凡人於朋友箴規尚不可背况君臣大義耶爾等當上念朝廷任用之恩下爲身家子孫之計各勉之慎之 御製朋黨論曰朕惟天尊地卑而君臣之分定爲人臣者義當惟知有君則其情固結不可解而能與君同好惡夫是之謂一德一心而上下交乃有心懷二三不能與君同好惡以至於上下之情睽而尊卑之分逆則皆朋黨之習爲之害也夫人君之好惡惟求其至公而已矣凡用舍進退孰不以其爲賢而進之以其不賢而退之或恐其所見之未盡當也故虛其心以博稽眾論然必眾論盡歸於至正而人君從之方合於大公若朋黨之徒挾

偏私以惑主聽而人君或誤用之則是以至公之心反成其爲至私之事矣孟子論國君之進賢退不肖旣合左右諸大夫國人之論而必加察焉以親見其賢否之實洪範稽疑以謀及乃心者求卿士庶民之從而皇極敷言必戒其好惡偏黨以歸於王道之蕩平正直若是乎人君之不自用而必欲盡化天下之偏私以成大同也人臣乃敢溺私心樹朋黨各徇其好惡以爲是非至使人君懲偏聽之生姦謂反不如獨見之公也朋黨之罪可勝誅乎我聖祖仁皇帝御極六十年用人行政邁越千古帝王而大小臣僚未能盡矢公忠往往要結朋黨 聖祖戒飭再三未能盡改朕卽位以來屢加申飭而此風尚存彼不願好惡之公而徇其私暱牢不可破上用一人則相與議之曰是某所汲引者也於是乎遠之若浼曰吾避嫌也不附勢也爭懷妬心交騰謗口以媒孽之必欲

去之而後快上去一人則相與議之曰是某所中傷者也親暱者爲之惋惜疏遠者亦慰藉稱屈卽素有嫌隙者至此反致其殷勤欲借以釋憾而修好求一人責其改過自新者無有也於是乎其人亦不復自知其過惡而愈以滋其怨上之心是朝廷之賞罰黜陟不足爲輕重而專以黨人之咨嗟歎惜爲榮以黨人之指摘詆訾爲辱亂天下之公是非作好惡以陰撓人主予奪之柄朋黨之爲害一至是哉且使人主之好惡而果有未公則何不面折廷諍而爲是陽奉陰違以遂其植黨營私之計也書曰予違汝弼汝無面從退有後言當此君臣告語望其匡弼而以面從後言爲戒夫是故一堂之上都兪吁咈用能廢歌颺拜以成太和之運朕無日不延見羣臣造膝陳詞何事不可盡達顧乃默無獻替而狡獪叵測蓄私見以肆爲後言事君之義當如是乎古純臣之事君也

必期致吾君於堯舜而人君亦當以堯舜自待其身豈惟當以堯舜待其身亦當以皋夔稷契待其臣孟子曰責難於君謂之恭陳善閉邪謂之敬吾君不能謂之賊夫以我君不能而謂之賊則爲君者以吾臣不能亦當謂之忍語云取法乎上僅得乎中苟不以唐虞君臣相期待而區區做法僅在漢唐以下是烏能廓然盡去其私心而悉合乎大公至正之則哉宋歐陽修朋黨論初爲異說曰君子以同道爲朋夫罔上行私安得謂道修之所謂道亦小人之道耳自有此論而小人之爲朋者皆得假同道之名以濟其同利之實朕以爲君子無朋惟小人則有之且如修之論將始終其黨者則爲君子解散而不終於黨者反爲小人乎設修在今日而爲此論朕必飭之以正其惑大抵文人掉弄筆舌但求購其才辨每至害理傷道而不恤惟六經語孟及宋五子傳註可奉爲典要

論語謂君子不黨在易渙之六四曰渙其羣元吉朱子謂上承九五下無應與爲能散其朋黨之眾大善而吉然則君子之必無朋黨而朋黨之必貴解散以求元吉聖人之垂訓亦旣明且切矣夫朋友亦五倫之一朋黨不可有而朋友之道不可無然惟草茅伏處之時恆資其講習以相攸助今旣登朝涖官則君臣爲公義而朋友爲私情人臣當以公滅私豈得稍顧私情而違公義且以君親之並重而出身事主則以其身致之於君尚不能爲父母有況朋友乎況可藉口於朋以怙其黨乎朕自四十五年來一切情僞無不洞矚今臨御之後思移風易俗躋斯世於熙皞之盛故兼聽並觀周諏博採以詳悉世務且熟察風俗之變易與否而無知小人輒議朕爲煩苛瑣細有云人君不當親庶務者信若斯言則皋陶之陳謨何以云一日二日萬幾孔子之贊舜何以云好問好察

此皆朋黨之錮習未去畏人君之英察而欲蒙蔽耳目以自便其
好惡之私焉耳朕在藩邸時坦易光明不樹私恩小惠與滿漢臣
工素無交與有往來門下者嚴加拒絕 聖祖鑒朕居心行事公

正無私故令續承大統今之好爲朋黨者不過冀其攀援扶植緩
急可恃而不知其無益也徒自逆天悖義以陷於誅絕之罪亦甚
可憫矣朕願滿漢文武大小諸臣合爲一心共竭忠悃與君同其
好惡之公恪遵大易論語之明訓而盡去其朋比黨援之積習庶
肅然有以懷尊卑之分歡然有以洽上下之情虞廷賡歌颺拜明
良喜起之休風豈不再見於今日哉○以張楷爲江西布政使徐
琳爲江蘇按察使由浙江糧道遷○癸亥諭總理王大臣等副將軍阿喇
衲在布隆吉爾病故朕甚惻然阿喇衲在軍前效力年久伊身原
有精奇尼哈番著再賞一拜他喇布勒哈番併令伊子承襲或令

其弟承襲俟阿喇衲靈柩到日議奏再阿喇衲遺本內請給伊父

阿南達諡號亦著賞給○甲子以花善爲理藩院侍郎

由太僕寺少卿遷

○乙丑復設太僕寺主簿一並給官房一所爲太僕寺衙門

八月癸酉王大臣等奏蒙恩頒賜

御製朋黨論訓誡諄切臣等

共矢公誠敬謹奉行

上召諸王大臣進見諭曰諸王大臣等所

奏未知眾意僉同否抑出於二三人之意而眾附名同奏者歟今

爾等旣稱眾意僉同朕心深爲慰悅爾諸臣但能如陳奏之言實

心奉行不但朕之福卽

宗廟

社稷之福亦爾諸王大臣之福

也朕受

聖祖仁皇帝付託之重繼登寶位朕之身上承

祖宗

之大統爲天下臣民主若朕居心行事有一時一事少存意見卽

朕自輕其身爾諸王大臣若尚存私見是豈知君臣之大義乎若

因中有私心尚懷疑畏則又不知朕之甚者也朕在藩邸時光明

正大不立黨援爲 皇考洞鑒爾等卽當以朕躬爲法朕四十五
年之內旁觀甚明在朝諸臣豈能無一瑕疵朕俱寬宥時時諄切
訓誨冀其改過自新今諸王大臣旣在朕前僉稱共矢公誠並無
異念此言 天地 祖宗實鑒臨之嗣後爾諸王大臣等果能同
心奉公協力襄贊 上天必加默佑不但身受厚福餘慶且及子
孫若或心懷異念退而違背禍必隨之豈能倖免乎朕惟望爾等
一德一心輔佐朕躬爲天下令主若朕行事偶有闕遺爾等或面
折廷諍或密封陳奏朕必嘉納至諸臣中有誠心爲國者眾人當
敬禮優待之其有心懷二三者當儆戒愧勵之以期君臣交勉共
臻上理庶今日諸王大臣所奏不徒託之空言也願爾等共勉之
○甲戌諭禮部會試爲掄才大典內外簾官子弟理應回避但跋
涉數千里志切觀光旣至京師不得與試深爲可憫朕於上科特

降諭旨另行考校然此止可暫行不便著爲定例今科

闈者其子弟著一體應試將試卷另封進呈朕派大臣校閱遴選庶人才不至屈抑至於闈中謄錄試卷弊端甚多其有賄屬者則書寫精工否則潦草舛錯致誤佳文著知貢舉及監試御史嚴行申飭其謄寫不工者必重加責懲令其重寫並令對讀官嚴飭各生悉心校對毋使字畫錯誤儻外簾官失於查察日後發覺將該管官員一併嚴加議處○乙亥年羹堯奏歸德堡等處番人內附並勦平拉扁上下二寨回賊○丁丑定親王及輔國公護軍領催等額數○己卯召蔡起俊來京以陳時夏爲湖北按察使由河南開歸道遷

○壬午發下裁名摺奏參劾浙江巡撫黃叔琳徇庇鄉紳陳世侃杖斃民人賀懋芳又從前審理湖廣鹽務收受商人吳雨山賄賂又伊弟巡視臺灣御史黃叔瓚回京時路過浙江縱僕騷擾地

方諭大學士等黃叔琳前差江南主試及任吏部侍郎時聲名頗好故用爲浙江巡撫自命下日屢次召見觀其神氣頓異言語浮泛跪聆訓旨總不安詳敬聽及到任後舉薦不公敷陳不當密摺奏請之事多屬支離朕頻降嚴旨置若罔聞今覽此奏大概真確事雖屑小然初蒙委任卽如此肆志將來放縱何事不可爲大負委任黃叔琳著解浙江巡撫任以布政使佟吉圖署理巡撫印務其陳氏僕人黃叔璫兩案情由著將軍安泰佟吉圖審理吳雨山一案著李周望塞楞額噶爾泰審理○詔停今年秋決○藉田瑞穀生○甲申諭江浙督撫等朕思天地之間惟此五行之理人得之以生全物得之以長養而主宰五行者不外乎陰陽陰陽者卽鬼神之謂也孔子言鬼神之德體物而不可遺豈神道設教哉蓋以鬼神之事卽天地之理不可以偶忽也凡小而邱陵大而川嶽

莫不有神焉主之故皆當敬信而尊事況海爲四瀆之歸宿乎使以爲不足敬則堯舜之君何以望秩於山川文武之君何以懷柔百神及河喬嶽今愚民昧於此理往往信淫祀而不信神明傲慢褻瀆致干天譴夫善人多而不善人少則天降之福卽少有不善者亦蒙其庇不善人多而善人少則天降之罰雖善者亦被其殃近者江南奏報上海崇明諸處海水泛溢浙江又奏報海甯海鹽平湖會稽等處海水衝決隄防致傷田禾朕念切民隱憂心孔殷水患雖關乎天數或亦由近海居民平日享安瀾之福絕不念神明佑護之力傲慢褻瀆者有之夫敬神固理所當然而趨福避禍之道卽在乎此能敬則謂之順天不敬則謂之褻天褻天之人願可望綏甯之福乎詩曰敬天之怒無敢戲豫又曰畏天之威于時保之朕固當朝乾夕惕不遑甯處以敬承天意亦願百姓共懷此

言內盡其心外盡其禮敬神如在以至誠昭事而不徒尚乎虛文
人意卽神意一念之感格自足以致休祥豈獨一鄉一家之被其
澤哉若百姓果能人人心存敬畏必獲永慶安瀾著該督撫將此
諭旨令地方官家喻戶曉俾沿海居民一體知悉○命州縣完補
虧空原參失察之上司一體開復○停差巡視湖河御史○戊子
諭都察院嗣後外省督撫有懷挾私心背法逞威如蔡珽之逼死
知府黃叔琳之杖斃無辜小民等事給事中御史等若受其請託
賄賂瞻徇隱瞞經朕於別處訪聞將都察院堂官一併議處○己
丑諭吏部國家分理庶績務在得人道府州縣等官尤屬要職其
有才幹素著廉節自持者儻不得以時上聞何以示勸著於各省
道府同知通判州縣等官內總督保奏三員巡撫保奏二員布政
使按察使各保奏一員將軍提督亦屬本省大員將所知者亦令

保奏一員俱各密封保奏不得會同商酌此保奏內不必將朕特
用之員塞責朕特用人員有才守兼優者不拘人數亦另摺奏聞
俟朕降旨調取之時再令來京引見如保奏不當日後劣蹟敗露
將保奏上司一併治罪○庚寅調石文焯署浙江巡撫以田文鏡
署河南巡撫

由布政使署

○壬辰

上召諸王宗室等俱入諭曰書云

克明峻德以親九族朕今繼承 皇考聖祖仁皇帝大業若不首

正宗室何以正天下萬民年來朕見宗室之習氣未善往來彼此
視若仇讐交相陷害動輒語人曰彼與我甚不相合專欲陷我否
則曰彼原與我有仇夫今日宗室皆是同 祖骨肉仇自何來此

皆讒邪構鬪其間令骨肉生隙耳朕未登大位之先不但朕之兄
弟宗室卽八旗大臣官員並無一人與朕有仇不特不與人結仇
亦不與人結黨爾宗室等一家骨肉視若仇讐反將母黨妻族子

塔及漫不相干之人視爲至戚親密往來朕在藩邸有年與舊族
皇后族及諸親戚之家並無一親密太過者且亦並無與滿漢大
臣及內廷執事人侍衛等一人交結親密往來者初時弟兄之內
尚相往來自戊子年 皇考下訓旨之後弟兄之內亦並無私相
往來之處若有私相往來之處豈能掩人之耳目乎自前歲公請
皇考臨幸花園弟兄畢集自後曾具饋招莊親王公允禎看花
又曾具饋招誠親王因病不赴又曾招恆親王怡親王果郡王逮
允禩出征時亦曾屢次具饋召之此外更無有也或有疑朕與二
阿哥不睦者夫二阿哥爲皇太子時乃國之儲君也二阿哥未得
罪之先朕但盡弟道臣道凡事敬謹因 皇考隆恩篤愛朕躬二
阿哥恐有妨於己遂至以非理相加然朕惟有盡己之道恭敬巽
順而已此皆眾所共知戊子年二阿哥得罪令伊保全者誰之力

歎此時 皇考聖躬違和又有禁錮允禩擊問允禩之事朕忘身
與家惟以 皇考爲念靡晷靡夜凡百躬親者四閱月欲報 皇
考隆恩於萬一 皇考知朕之爲人行事爰付大位蓋因朕心仁
慈毫無朋黨偏私能明大義可以保全爾等之故也前歲十一月
十三日 皇考賓天之後朕繼承大業授受之際中外救甯以成
國家之善慶夫宗室之惡習朕若明知而不爲整理仍聽爾等相
仇陷是負 皇考付託大業之意矣爾等內有背主鑽營結黨之
人豈能逃爾等眾人耳目若果能努力改過自新頂戴君王殫心
盡力於國家朕亦必爲包容如蘇努等懷挾伊祖舊讐專意離間
宗支使互有煩言人人不睦朕卽位以來棄伊過惡格外施恩欲
其改過從善伊等不從仍鑽營搆亂毫不悛改朕當以國法懲之
豈可容其如此乎爾等當念朕躬爲 聖祖之繼體承 太祖

太宗 世祖 聖祖天下 社稷之重朕爲令主羣生共享太平
之福使感戴朕躬是卽感戴 聖祖皇考也聖經云在止於至善
朕望爾等偕至於善尤望爾等輔佐朕躬善益求善朕居大位勤
念 皇考付託之重思日孜孜惟善是從施於有政以期兼善天
下爾等當體朕此意各存善心各行善事朕若少有過失爾等各
竭所知力爲匡弼俾朕得爲令主誠使宗室之內無非善人善事
以示天下後世豈不美哉若爾宗室不能親睦相陷如仇幸遇
聖祖仁皇帝及朕躬概與包容百事消釋以有今日爾等自後當
益相親相睦恪遵國法各守本分敬慎勤儉豈獨朕心歡悅天下
之人誰不稱美而加尊敬乎如大阿哥允禔廉親王允禩郡王允
禴貝子允禔俱不知本量結爲朋黨冀遂其志 皇考洞鑒此情
禁錮允禔令允禴出征西甯置之遠地無知之人反謂試用允禴

將定儲位允禩遂妄生覬覦蓋亦思 皇考年高體弱置繼承之子於數千里之遠有是理乎伊等本係嫡親兄弟又結爲同盟更相親密鑽營內更換之人巧行賄賂收服人心家貧者陰與貨財好名者美言稱獎徧置耳目思欲待間乘時成伊大志此皆 皇考所洞悉者也從前眾皆保廉親王爲皇太子視爲奇人今朕封伊爲親王用之重地彼之所以報朕待朕者舉國皆知之伊先不知君臣之大義況其他乎因此朕卽位以來離散伊黨令居遠地惟望伊等改悔前行不致生事罹於國法耳朕之仁愛至意 上天知之朕躬非所惜但所居者 太祖 太宗 世祖 聖祖之位 社稷天下之所繫也書曰以親九族九族旣睦夫親之者朕也睦則在於爾等若不知大義擾亂國政朕雖曲加寬宥多方教訓爾等不悛不改朕亦無可奈何也夫人不知己之惡反以人之

言其惡者爲仇又如子孫既知祖父所行之非理應勉修省乃以先世所仇益相仇恨庸懦者挾仇尚淺英僞者挾仇更深此等習氣實爲亂階亟宜省改凡人必言行相合乃可嘉耳朕今嗣大位何者爲朕所行之事六部大臣外省督撫皆能遵旨奉行是卽朕所行之事也朕下訓旨於爾等而爾等不能悛改舊習卽朕之不能言行相合也俾朕之言行相合者在爾等爲朕努力矣爾等內有爲蘇努吳爾占星尼之幼輩者誠知爾等長輩之罪戾雖未匡救於前但從此勤修善行不復繼其奸宄惡蹟則庶乎其可也若聞此慈訓猶執祖父以來舊仇稍存報復之見其人適自取殃禍耳爾等敬識之尚其竭力自治能自治則皆善人矣又爾宗室等居家各宜守分節儉毋或侈費當以虛名僭稱爲戒爾等行事儻侈亦非美事貝子公等輒擬諸王官員閒散宗室輒擬貝子委

使其身果爲王貝勒而下人稱爲王貝勒宜也下人非分之詔稱於己何榮適足取人嘲笑耳朕初爲貝勒時人稱爲王輒爲赧顏又爾等宗室如有讀書作文等事欲資講習當用漢人中舉人進士此輩皆吾國家考取錄用之員其心本自無他有一種考試不中之人不安本分在外各處夤緣誘人不善從中覓利乃漢人中之賤流斷不可與之親近爾等敬識之朕望爾等克篤忠誠盡心效力凡知君臣大義者眾共敬之其有怨望搆亂不知君臣大義者眾共非之如此則善人知感愈加爲善惡人知恥思改其惡矣凡諸陰詭詐惡好結仇讐之習爾等返之於身有則速改無則加勉家庭之間崇實安分習武學文存敬慎勤恪之心行睦婣任恤之事朕所日望者誠實之人光明正大所深惡者作僞之人詭詐陰險爾等惟朕所望者是遵所惡者是戒福祿自至矣吾宗室甚

眾果能和衷一體交相愛恤交相匡救各持大義爲子孫表範世
世率由如此則我家庭之內和氣達於天地億萬斯年垂諸史冊
我宗室之榮顯何如哉何爲守目前之陋習挾往日之微嫌而棄
千萬載之令名乎況爾等雖固守此陋習必無所益堅挾此微嫌
必不能報徒然犯法受辱貽羞天下後世而已不虛朕此一番誠
心訓誨乎爾宗室等尚其誠服而力行之朕不勝厚望○癸巳戶
部等衙門議覆河南巡撫石文焯疏言豫省開封府轄四州三十
縣河南府轄一州十三縣汝甯府轄二州十二縣地方遼闊請改
設直隸州分轄將開封府屬之西華商水項城沈邱四縣分隸陳
州臨潁襄城鄆城長葛分隸許州密縣新鄭二縣分隸禹州滎澤
滎陽河陰汜水四縣分隸鄭州其原武延津二縣均在河北原武
縣就近歸懷慶府管轄延津縣就近歸衛輝府管轄河南府屬之

靈寶閩鄉二縣分隸陝州汝甯府屬之光山息縣固始商城四縣分隸光州直隸州稽察各縣錢糧案件俱照知府之例處分至直隸州經徵錢糧令道員不時盤查均應如所請從之○甲午禮部等衙門遵旨再議從祀 孔廟宜復祀者六人林放蘧瑗秦冉顏何鄭康成范甯宜增祀者二十人縣廩牧皮樂正子公都子萬章公孫丑諸葛亮尹焯魏了翁黃幹陳淳何基王柏趙復金履祥許謙陳澹羅欽順蔡清陸隴其入崇聖祠者一人張迪宜增置博士者四人冉雍冉伯牛子張有若此三十一人或親承訓論遞衍源流或遠契心傳倡明正學升諸從祀之列予以延世之賞人心公論以爲允合得旨朕念先賢先儒扶持名教羽翼聖經有關學術人心爰命九卿詳議今諸臣參考周詳評論公正甚合朕心著依議行○禁武弁私役兵丁○貴州提督趙坤奏處置狝家苗機宜

及請增定番一路額兵諭安靜近於因循振作近於多事迹雖相類而其實不同無事時不可多事有事時不可因循要在審觀時勢相度機宜而爲之方能中其肯綮也若一味苟且彌縫置庶務廢弛而不問則爾等職任封疆之謂何然不熟思審處謀及始終而孟浪從事脫至有損國威則尤其不可者也總在爾等文武大員正己率屬勤慎自勵誠以馭下公以考績營伍旣皆整飭有司又復廉明則兵民和輯根本固矣果能若此遇此等愚頑苗獮或以德化或以威服胡令不行曷禁不止耶可與撫臣同心協力治理地方務宜夙夜敬謹精勤勿懈以革除習弊置黔民於衽席之安方不負朕諄諄告誡企望之殷也○戊戌諭兵部青海旣平之後涼州莊浪所有賊番以次勦撫官兵效力厯著功勳今大將軍年羹堯等奏稱乘川兵回汛之便並將歸德至松潘口外一帶番

族或勦或撫悉無梗化殊屬可嘉在事有功人員著於勦撫桌子山之外另行議敘○己亥豐澤園嘉禾生

九月辛丑朔諭總理事務王大臣等阿爾泰處軍事已竣著將軍功議敘將軍丁壽特給拜他喇布勒哈番世襲罔替議敘時仍照伊應得爵級歸併計算○癸卯諭戶部開例捐納少助軍需原屬一時權宜非可行之久遠皇考曾屢言捐納非美事朕繼承大統亦以軍需浩繁戶部供支不繼捐納事例仍暫開收今仰賴皇考在天之靈西邊軍務將已告竣卽見有需用錢糧之處爲數無多著將戶部與陝西各項事例卽行停止其運糧赴巴爾庫爾與肅州所動西安藩庫銀兩悉作正項報銷○甲辰戶部等衙門議覆兩江總督查弼納奏江南爲財賦重地而蘇松常三府之州縣尤爲繁劇額徵賦稅款項繁多獄訟刑名案牘紛積爲牧令者

卽有肆應之才亦難治理請將蘇州府屬之長洲吳江常熟崑山嘉定五縣太倉一州松江府屬之華亭婁縣青浦上海四縣常州府屬之武進無錫宜興三縣各分立一縣庶得因地制宜之法又此三府舊設同知共六員通判共六員今應各裁去三員每府止畱同知一員通判一員以捕盜者兼司防海管糧者兼司水利亦足辦理其長洲吳江崑山華亭婁縣青浦上海七縣舊有縣丞二員亦應各裁去一員新分之十三縣各設知縣一員典史一員將各該縣疆域田畝均勻分界一應錢糧刑獄案卷詳查分晰各歸所轄之處辦理均應如所請至於建立城垣工費浩繁江南雖有大市鎮率與溪河水港錯雜其閒形局不能方整應將新縣之官吏衙署各與舊縣同城而居如係附郭之縣所分者仍駐府城其學宮亦不必另建似爲省便從之尋定蘇州府長洲分縣曰元和

吳江分縣曰震澤常熟分縣曰昭文崑山分縣曰新陽嘉定分縣曰寶山太倉州分縣曰鎮洋松江府華亭分縣曰奉賢婁縣分縣曰金山青浦分縣曰福泉上海分縣曰南匯常州府武進分縣曰陽湖無錫分縣曰金匱宜興分縣曰荆溪○江蘇布政使鄂爾泰奏七月十八十九兩日颶風迅發海塘衝決死者甚眾崇明縣被災尤甚已撥存畱米一萬石又買米二千石平糶其餘州縣詳明督撫量災之輕重發銀散給再查松江府屬之海塘土隄衝決三千六百七丈上海護塘衝決九百一十丈均應急爲搶築以防秋潮大汛請權動正項地丁給發堵築卽以被災之民充役給以工食一舉而塘工民命並可兩全得旨應如是行築隄之策甚屬良法去歲山東挑淺大得其益可覈詳督撫題請舉行○丙午調博爾多爲安徽布政使董永艾爲山東布政使○戊申諭兩廣總督

孔毓珣據奏請於廣東開採以濟窮民朕發廷臣會議知昔年粵省開礦聚集多人以致盜賊漸起鄰郡戒嚴是以永行封閉夫養民之道惟在勸農務本若皆舍本逐末爭趨目前之利不肯盡力畝畝殊非經常之道且各省無賴之徒望風而至豈能辨其奸良而去留之勢必至眾聚難容況礦砂乃天地自然之利非人力種植可得焉保其生生不息今日有利聚之甚易他日利絕則散之甚難曷可不徹始終而計其利害耶至於課稅朕富有四海何藉於此原因憫念窮黎起見諭爾酌量令其開採蓋爲一二實在無產之民許於深山窮谷覓微利以餬口資生耳爾等揆情度勢必不致聚眾生事庶或可行若招商開廠設官徵稅傳聞遠近以致聚眾藏奸則斷不可行也又諭爾任廣西巡撫時與提督韓良輔會奏大金蕉木等山礦徒地方官不能驅逐添調官兵防汛今廣

西巡撫李紱摺奏有外省無藉礦徒流入蕉木山隨飭賀縣知縣會同富賀營守備帶兵三路並進驅入廣東又稱廣東海崗宿塘等處礦徒梁老二聚集多人汛兵子弟亦多附和巡檢不能防緝等語據此廣東既有巢窟雖從廣西暫驅出境亦復何益此關繫地方利害爾總督全粵宜會同兩省巡撫提督設法驅除解散毋因前曾奏請開礦小有回護以致慢忽因循且聞所聚礦徒已有名目將來爲害不輕非比一二窮民偷採或可法外寬宥斷宜速行嚴禁解散無使滋蔓督撫身任封疆重寄職在戢暴安民如應提調官兵處悉心籌畫而爲之不可姑息省事貽害地方務期整飭甯謚以副朕意○庚戌戶部等衙門議覆山東巡撫陳世倌疏言濟南府轄三十州縣兗州府轄二十七州縣幅員旣廣管轄殊難請改設直隸州分轄將濟南府之新泰萊蕪長清三縣分隸秦

安州陽信海豐樂陵三縣分隸武定州利津霑化蒲臺三縣分隸濱州兗州府屬之曹縣定陶二縣分隸曹州刻城費縣二縣分隸沂州嘉祥鉅野鄆城三縣分隸濟甯州將泰安州武定州濱州曹州沂州濟甯州俱升爲直隸州統轄各縣一應考成照知府之例處分其泰安等三州錢糧令濟東道盤查曹州等三州錢糧令兗甯道盤查均應如所請從之○命賞給會試下第舉人盤費雲南廣東廣西貴州四川五省每人銀十兩福建浙江江南江西湖廣陝西六省每人銀七兩直隸山東山西河南四省每人銀五兩○壬子兵部議覆浙閩總督覺羅滿保疏言嘉興之乍浦與江南洋面交界請增設兵五百名撥定海鎮戰船十隻以副巡防其兵數請於水陸各營內酌量抽撥再磐石營馬兵旣改爲水師應將該營馬兵七十三名月餉改添爲水戰兵一百四十六名其磐石營

陸汎請改歸樂清營管轄再鎮海瑞安二營俱改水師請將二營馬兵二百二十四名改爲水戰兵四百四十八名其鎮海營陸路穿山崑亭霽橋各汎請改歸提標左營管轄瑞安營陸汎請改歸温州平陽營管轄均應如所請從之○裁陝西甯夏水利都司成縣黃渚關巡檢各一○癸丑諭戶部驍騎校護軍校雖係官員實與兵丁無異其通倉支領米石所用車價較多嗣後著於京倉支領○以魏廷珍爲盛京工部侍郎原任湖南巡撫○甲寅命山西丁銀攤入田賦徵收○丙辰諭禮部今歲會試取中二百九十名朕茲續取硃卷著於本科榜後再行出榜○兵部議准兩江總督查弼納疏江南太湖口岸極多惟洞庭東山最爲緊要請將新設參將一員駐紮其地左營守備應駐湖東南隅之簡村右營守備駐湖東北隅之周鐵橋千總二員分駐鮎魚口馬跡山把總四員分防龍

山東山鳳川吳淩其原防江南鳳川吳淩之浙江把總改歸浙江
防汛江南西山地方仍令原駐西山之浙江遊擊巡防再江南新
添兵丁五百名若於各營抽調未免汎廣兵單請於提鎮以至於
把親丁內撥補從之○己未戶部議准兩江總督查弼納疏江南
財賦甲於天下款項繁多地方遼闊知府實難查察請以鳳陽府
之潁州亳州泗州廬州府之六安州蘇州府之太倉州淮安府之
邳州海州揚州府之通州俱改爲直隸州以潁上霍邱二縣隸潁
州太和蒙城二縣隸亳州盱眙天長五河三縣隸泗州英山霍山
二縣隸六安州鎮洋嘉定寶山崇明四縣隸太倉州宿遷睢甯二
縣隸邳州贛榆沭陽二縣隸海州如皋泰興二縣隸通州其直隸
州一切考成俱照知府例處分至潁州等四州錢糧令廬鳳道盤
查太倉錢糧令蘇松糧道盤查邳州錢糧令淮徐道盤查海州通

州錢糧令淮揚道盤查從之○辛酉河道總督齊蘇勒副總河嵇
曾筠奏河工平穩予齊蘇勒世襲拜他喇布勒哈番嵇曾筠加三
級○壬戌以江浙沿海州縣颶災命湖廣江西山東河南安徽發
帑買米運往平糶○甲子給軍前工部侍郎綽爾岱拖沙喇哈番
世職○乙丑諭大學士九卿等朕前因兵部所奏年滿千總一事
未詢定例誤降諭旨彼時大學士等應卽詳陳其故使朕不至有
誤今幸所降諭旨尙未發出朕已詢知定例儻朕知之不早勢必
將發出諭旨追還更改殊妨政體 皇考御極六十餘年諸事無
不諳練朕在藩邸年久雖於羣情利弊事理得失無不周知至於
國家政事有關定例者朕既經歷未久如何可比 皇考其匡正
之責實在爾等朕屢降諭旨君臣誼同一體卽使人君不能容納
臣下之言猶當一心愛主極陳無隱況朕自御極以來痛懲逢迎

之弊諄諄以實心匡弼朕躬期望爾等君子之過也如日月之食其過也人皆見之及其更也人皆仰之朕之素性不吝改過苟自知其非卽於大廷廣眾之中明言以改之從無護庇粉飾之事今爲年滿千總所降諭旨爾等具悉成例辦事有年豈不知朕偶誤總以逢迎緘默爲心或是或非聽朕爲之而不言則待朕者何薄耶嗣後爾等各宜深悔前非務思君臣一體之大義竭誠殫慮仰副朕懷○予故鎮國公登塞祭二次造墳立碑諡恪恭○丁卯工部議浙閩總督覺羅滿保疏覆御史錢廷獻奏請開西湖東湖漑溉仁和錢塘海甯三縣田畝查三縣之田皆賴上下兩塘河流漑溉水源皆自西湖流注自明季東湖壅塞而西湖之流不能溥蓄三縣之田旱不兼旬卽憂枯槁湖內舊址先被民人作爲田蕩妨礙水流其納官銀糧爲數無幾而所損於三縣民田者甚多應請

豁除糧額盡行清出其淤淺沙灘三千一百二十二畝相應挑濬城內之河通西湖之血脈亦應酌量開濬城外一帶河身及支港淤塞之處應責成沿河各縣勸諭業主佃戶漸次開濬至東湖實西湖蓄水之地塘屏水之源自宋以來從未開濬僅存湖址六百餘畝竟同陸地工程甚大非一時可以並舉俟西湖工完再爲確議運河四十餘里皆多淤淺糧船出入田畝車戽最關緊要亟應疏濬均應如所請從之○己巳復設江蘇蘇松巡道

冬十月甲戌復設廣東潮州運同兩廣運使經歷各一○賜陳惠華等二百九十九人進士及第出身有差○戊寅吏部帶領明代後裔鑲白旗正定府知府朱之璉等六人引見得旨朕遵 皇考諭旨仰體 皇考聖心於明代後嗣特加曠典封以侯爵著將阿思哈尼哈番朱廷椒之嫡孫朱之璉封爲一等侯世襲凡伊族內

人丁俱合入於正白旗○山東紳士請捐修文廟 上不許命給
帑○癸未諭九卿詹事科道朕惟周禮有司勳之官凡有功者書
名太常祭於大烝祭法曰以死勤事則祀之凡以崇德報功風勵
忠節也 太祖高皇帝肇造鴻圖 太宗文皇帝式廓區夏 世
祖章皇帝奄有萬邦自勦業以至定鼎將帥之臣致命立功者不
少 聖祖仁皇帝臨御六十一年中間殲滅三逆永清朔漠以及
平定西藏臺灣雖天戈所指如疾風振槁而師旅之臣捐軀馬革
及守土之官見危授命者所在多有邇者青海蕩平西域效順然
自用兵以來將士奮勇前驅亦有歿於行陣者此皆盡忠報國之
臣朕甚嘉之亦甚憫之當於京城建立祠廟春秋妥侑其偏裨士
卒力戰敵愾舍生取義者亦附列左右用以褒崇大節揚表芳徽
俾遠近視聽勃然生忠義之心於治道亦有裨益仍令翰林官纂

其籍貫事蹟各爲立傳彙成一編垂諸永久爾等悉心詳議具奏
尋議凡文武諸臣臨陣捐軀守土授命以及偏裨士卒赤心報國
奮不顧身者應令兵部詳查檔案行文八旗直省督撫將籍貫事
蹟詳晰繕冊具奏其建祠之處應於京城內相度地方鳩工庀材
建立祠廟製造牌位請 欽定匾額擇日懸挂文武諸臣牌位安
設正祠偏裨士卒牌位安設兩廡入祠日遣官致祭其每年春秋
二次祭祀交太常寺備辦仍交翰林院詳查史冊立傳成編從之
○建陝西郃陽縣夏陽川城堡設參將守備各一千總二把總四
兵八百名○甲申諭刑部朕繼承大統於各衙門事務無不加意
詳察爾部之事尤有不同俱係民命所關豈可絲毫錯誤乃司官
于灑勒可得審理冒領俸米一案將無辜之人妄行夾訊洵酷吏
也凡用刑最宜詳慎必遇人命盜案其罪重者方可夾訊若其輕

罪則斷不可用蓋執法不可不嚴存心不可不慈也卽如審理此案初次訊問不明止須向通州細細察訪便可得矣何得如此濫用重刑乎擬罪必案律例講求習熟方不至於錯誤乃當閒暇之時置律例於不問臨時聽信書吏高下其手尚得謂之詳慎乎且司官有承審定招之責非實在能幹之員不能辦理于灝勒可得據爾部堂官稱爲中等夫中等者尚且如此下等者更可知矣傳諭各司官等須自己酌量年力精壯者尚可勉勵其年老殘疾不能辦事者當速告退勿得尸位素餐○丁亥諭兵部奮威將軍岳鍾琪具奏副都統達爾阿爾什總兵黃喜林王嵩孫繼宗營總蘇圖等統領大兵窮追羅卜藏丹津直至花海子拏獲丹津渾台吉及其妻子並招撫三十三家台吉當此口外水凍草枯之候官兵奮勇遠行甚屬可嘉自大將軍以下著從優議敘官兵勞晉朕甚

憫之一切馱載輜重馬駝必多損傷著查明免其賠補其軍營馬匹如有倒斃亦令領帑購買補數再馬兵每名賞銀八兩步兵每名賞銀六兩蒙古兵有隨軍效力者亦著奮威將軍按其行走等次應如何賞給之處確議奏聞○己丑孫渣齊綠事革職以綽奇爲工部尚書由甘肅巡撫遷○庚寅戶部議覆署河南巡撫田文鏡奏豫省兌運漕糧請將河北之彰德衛輝懷慶三府及陽武原武封邱三縣起運本色米一十萬四千餘石仍在衛輝五陵水次兌運外其開歸等五府一州折徵採買米一十五萬餘石自衛輝府至大名府小灘鎮沿河一帶地方不拘何處買米卽於彼處交兌不必拘定衛輝小灘則兌運旣屬便宜而漕船不至遲誤查河北三府三縣之糧向在衛輝五陵水次兌運應如所奏至開歸等處採買漕米該撫奏稱不必拘定衛輝小灘恐沿路交兌漫無處所則駕

運漕艘者有往來移候之苦辦買漕糧者開爭近避遠之端殊爲未便查衛輝至小灘經濟滑內黃大名四縣境其間沿河村落頗多巨鎮大市商販所集計運糧之船約三百隻莫若分定地方撥兌既有一定之所而糧米散於各處採買又可免牙行囤戶之弊矣從之○以颶災發帑賑兩淮沿海竄丁並免逋課○辛卯以胡期恆爲甘肅巡撫諾穆渾爲陝西布政使由郎中遷○以傅德爲內閣學士彭振翼爲甘肅布政使張适爲甘肅按察使由陝西糧鹽道遷○癸巳諭直省督撫提鎮等從前題奏事件俱有部費朕屢次降旨嚴禁今聞仍蹈前轍凡事不講部費不能結案各衙門書吏勢難枵腹辦事酌量稍給紙筆飯錢於理猶無違礙何得費至盈千累萬以遂小人無厭之求況各省大臣題奏事件俱朕親覽交部定議及議覆時朕詳覽獨斷在各省大臣何不自信甘受蠹役欺枉耶

至會考府係朕新設特爲稽查各部諸弊以清錢糧之出入會考
府王大臣朕可保其無受使費之理今聞有各省畏懦不明之大
臣另加一倍使用殊可痛恨嗣後著永行禁止若經朕查出與受
一體治罪○乙未理藩院議覆厄魯特郡王額駙阿寶呈稱自伊
祖顯寶汗歸誠向附至今百年受 聖祖仁皇帝隆恩安居樂業
因青海兄弟妄亂生事致干天討臣等理應一併殄滅復荷寬恩
存畱遊牧臣請於青海處賜閒曠之地居住管理青海人等不致
復萌亂心等語查阿寶之父巴圖爾額爾克濟農和洛里自青海
來歸封爲貝勒阿寶承襲後於平定西藏有功封爲郡王應如所
請見有貝子丹忠所居之地甚爲寬大卽令阿寶駐牧並令大將
軍年羹堯派員齎餉助其移徙安插從之○撫遠大將軍年羹堯
疏奏甯夏駐紮滿洲兵丁之處應設將軍一員副都統二員滿洲

協領四員蒙古協領二員每旗滿洲佐領各二員蒙古佐領各一員每佐領下防禦各一員驍騎校各一員八旗共派駐防兵二千二百名又八旗應添步兵一千二百名左右兩翼添放防禦各一員令其管轄步兵看守城池倉庫於馬甲內擇其漢仗好者令爲前鋒再甯夏旣駐滿洲兵丁應設理事同知一員從之○丙申諭諸王大臣等朕盡三年喪禮齋居養心殿闡裕親王保泰在家演戲及面詢之公然承認復任意妄奏大失臣節保泰性本昏愚並無爲國宣力之志雖勉強任用亦於國事無益著將伊所管宗人府禮部都統武備院及看守大阿哥等事俱行罷革伊子亦俱著革退朕登極時卽將保泰加恩重用伊之三子俱格外優待保泰幼年在內廷行走 皇考令朕教其經書算法多方率領指示保泰受朕恩遇甚深乃自蘇努問罪以來卽生異心其不知輕重如

此朕特降此諭旨宣付起居注並令宗人府及諸王大臣等知之
○諭內閣前因刑部尙書不得其人將阿爾松阿特加擢用乃受
任以來無心效力朕勸之不聽懲之不畏令其總理天下刑罰大
事於國事無益刑部尙書員缺著禮部尙書塞爾圖調補○丁酉
吏部議覆川陝總督年羹堯奏甘肅之河西各廳自古皆爲郡縣
至明代始改爲衛所今生齒繁庶不減內地宜改衛所爲州縣請
改甯夏衛爲甯夏府其所屬左衛改爲甯夏縣右衛改爲甯朔縣
中衛改爲中衛縣平羅所改爲平羅縣靈壽所改爲靈州甯夏中
路廳改爲甯夏水路同知西路廳應仍舊駐紮中衛以資彈壓俱
隸甯夏府管轄西甯廳請改爲西甯府所屬西甯衛改爲西甯縣
碾伯所改爲碾伯縣西甯通判專管鹽池卽爲西甯鹽捕通判西
甯之北川應設一衛爲大通衛俱隸西甯府管轄涼州廳請改爲

涼州府所屬涼州衛改爲武威縣鎮番衛改爲鎮番縣永昌衛改爲永昌縣古浪所改爲古浪縣莊浪所改爲平番縣莊浪同知經理茶務應仍其舊俱隸涼州府管轄甘州廳請改爲甘州府所屬左右兩衛改爲張掖一縣山丹衛改爲山丹縣高臺所改爲高臺縣以肅州之鎮彝所併入俱隸甘州府管轄其肅州衛事務卽令肅州通判管理靖遠衛事務改爲靖遠廳管理所有衛所之守備千總及舊有大使三員悉行裁去均應如所請以上四府設知府四員經歷四員知州一員知縣十四員典史十四員其大通衛設守備一員張掖縣添設縣丞一員至各處教職或添設或改移應令該督撫確查另議從之○封厄魯特郡王額駙阿寶之姪協理台吉功額喇卜坦爲輔國公○戊戌革二等公阿爾松阿爵發奉天居住以其伯音德襲○己亥廣東巡撫年希堯奏暹羅入貢稻

種果樹等物應令進獻並運米來廣貨賣來船捐目九十六人本
係漢人今皆求免回籍並爲奏明得旨暹羅國王不憚險遠進獻
稻種果樹等物最爲恭順殊屬可嘉應加獎賚其運來米石令地
方官照粵省見在時價速行發賣不許行戶任意低昂如賤買貴
賣甚非朕體恤小國之意嗣後且令暫停俟有需米之處候旨遵
行其壓船隨帶貨物一概免徵稅銀來船捐目徐寬等九十六名
雖係廣東福建江西等省民人然住居該國歷經數代各有親屬
實難勒令遷歸著照所請免令回籍仍在該國居住以示寬大之

典○以李維鈞爲直隸總督

由巡撫遷

十一月壬寅諭王貝勒公等悉有一定品制國家大典攸關不可
稍有踰越亦不可過爲貶損各按品制遵行乃爲合理朕前爲貝
勒時並無僭越之處後爲親王亦未有意謙讓惟遵國之制守己

之分而已近聞廉親王允禩過爲貶損凡事俱減於伊爲貝勒之時至將引馬悉行撤去此伊專事詭詐巧取謙讓之名誑惑愚人邀其稱譽懷姦敗法心迹昭然將此曉諭諸王貝勒公等嗣後再有此等不按定制過爲貶損以取虛名紊亂典章者著宗人府卽行糾參○調伊都立爲刑部左侍郎以欽拜兼兵部侍郎行走都統○以鄂賴爲理藩院額外侍郎由內閣學士遷○癸卯諭禮部考試繙譯舉人不必分作三場止須一次考試一日一夜量其所能章奏一道或四書或五經酌量出一題其優劣便已可見此考試並無漢文不必派漢大臣再考試舉子俱係八旗內人其繙譯好者眾所共知卽字蹟亦最易認識伊等試卷應行謄錄著於六部各衙門善書之筆帖式內酌量足用選取令其謄寫選中之卷進呈時再定額數仍選備卷呈覽其分校及巡察等員亦俱照文鄉試例

派用○甲辰諭各省巡撫等朕念商賈貿易之人往來關津宜加
恩恤故將關差歸併巡撫兼管以巡撫爲封疆大吏必能仰承德
意加惠商旅也但各關俱有遠處口岸所委看管之家人賢愚不
一難免額外苛求及勒取飯錢等弊稍不如意則執送有司有司
礙巡撫之面徇情枉法則商民無所控訴矣嗣後將上稅課之貨
物遵照則例逐項開明刊刻詳單分發各貨店徧行曉諭使眾皆
知悉其關前所有刊刻則例之木榜務令豎立街市人人共見不
得藏匿屋內或用油紙掩蓋以便高下其手任意苛索立法如此
自能剔除弊端但爾等受朕委任之重尤當仰體朕心遴選誠實
可信之人以任稽查之責必期商民有益方爲稱職○庚戌宗人
府議奏世子弘展屢次獲罪俱蒙恩宥今又訛詐銀兩請革世子
爲閒散宗室令伊父誠親王允祉嚴加約束從之○嚴禁兵民等

出殯時前列諸戲及前一日聚集親友設筵演戲○臺灣生番蘭

郎等四社歸順○以巴林二等台吉桑里達出兵有勞授爲輔國

公○壬子以綽爾岱爲工部額外侍郎巴泰爲工部右侍郎以查

郎阿爲吏部左侍郎

由吏部郎中遷

○以楊文乾署河南布政使

原任陝西榆林

道○湖南巡撫王朝恩奏報岳州衛所屬地方旱災雖據詳報但

臣履任伊始未經確查事關蠲免錢糧動支倉穀請俟勘明分數

題請賑濟得旨岳州衛田穀被旱情形從前曾經署撫朱綱題報

差員確勘已將該衛所屬地方實被旱災之田畝應免錢糧分數

造冊呈送矣王朝恩當如救焚拯溺應散賑者卽行散賑應免錢

糧者卽行奏聞如俟再加確查始行散賑被災之民甯可待乎若

謂錢糧緊要民命尤屬緊要有民始有錢糧所奏甚屬錯謬此事

已經遲誤嗣後再如此遲誤定行治罪將本發回著嚴飭行○裁

陝西潼關榆林靖邊等衛所守備千總及教職等缺移華陰縣
丞駐潼關各衛所錢糧歸併附近州縣管理生童歸該管州縣考
試○免陝西康熙五十七年至六十年積逋糧草及地丁銀二十
二萬有奇○予故輔國公普照祭二次造墳立碑○予故盛京禮
部侍郎管色祭葬○癸丑諭總理事務王大臣等廉親王存心狡
詐結黨營私自朕卽位以來凡遇政事百端阻撓卽如清查工部
清片一案廉親王以重爲輕以輕爲重顛倒錯亂其從前所犯應
議之案交宗人府議處者不止數十事朕俱曲爲寬宥但切加訓
誡冀其改過自新並未降一階罰一俸乃在廷諸臣向爲廉親王
所愚反以朕爲過於苛刻爲伊抱屈此朕審察眾人神色而知之
一年以來大小臣工因廉親王貽累者甚多乃甘受罪戾毫無悔
心而廉親王亦恬然自安竟不知愧並不念及國法稍加儆懼由

此觀之黨援終不能解散也黨援必由眾人附和而成若廉親王一人何所恃而如此行爲乎工部郎中岳周拖欠錢糧廉親王私幫數千金代伊完納其意以爲他人凡事苛刻而我獨優容加恩不但邀結岳周一人並令所管之人無不感戴如此沽名邀譽竟不知其何意岳周並非無力完項之人昨伊將見銀二萬兩請託大將軍年羹堯薦伊爲布政使年羹堯據實參奏朕用人皆出至公此等小人不正傲倖妄進並欲使朕之聲名有玷耳廉親王至今尙無改悔之心諸臣復不省悟積習若此何所底止朕用是諄諄誠諭儻諸臣洗心滌慮盡改前非則廉親王黨散勢孤朕得以不傷骨肉手足之情兼可無負 聖祖仁皇帝保全之恩其令天下臣民咸知朕意○諭內閣九卿詹事科道等歷年戶部庫帑虧空數百萬兩朕在藩邸知之甚悉此乃國家經費所關甚爲重大

故朕特令怡親王管理清查朕思康熙年間之虧空此時不能清楚儻雍正年間又有虧空將來亦復不便稽查積弊相因何以經國用而垂法紀乎後經怡親王查出實在虧空二百五十餘萬兩深以追補爲難請以戶部所有雜費逐年代完約計十年可以清楚此怡親王欲善爲歸結之意朕思歷年經手俱有堂司官員當時任意侵漁此時置之不問令其脫然事外國法安在諭令交與戶部尙書孫渣齊辦理孫渣齊職司戶部以致虧空如此之多朕曲加寬宥並未革職止令伊查明經手官員量力派令完補乃孫渣齊徇情庇護私人又有冒賭子一案揆厥情罪實不容追朕又念先帝舊臣不忍正法將孫渣齊革職其各員名下應追銀兩照所派數目作速追完其餘一百餘萬兩照怡親王所請在戶部逐年彌補若各員應行追完之項將來仍不全完則按律治罪朕

亦不能再寬矣至於怡親王欲上補國課下全眾員多方籌畫辦理此事甚屬可嘉而無知嫉妬小人反謂王過於苛刻不但昧於天理卽人情公好之一念何在乎特諭爾等知之○諭九卿大臣及工部上駟院兩衙門官員等朕御極以來令廉親王總理事務凡伊所辦之事皆要結人心欲以惡名加之朕躬從前令伊管理藩院時伊將來京科爾沁台吉等不給盤費盡皆逐出致使科爾沁台吉等哭泣而回後令伊管理工部凡關繫錢糧應嚴追還項者伊欲市恩竟行寬免應寬免者反行嚴追凡係小事故作寬容並不顧理之是非大事有錯便自承當欲以抗違朕旨前因工部郎中岳周遲誤柴炭廉親王旣已題參隨暗給銀二次共一千七百兩後又借與銀二次共一千六百五十兩以此施恩欲收眾人之心今岳周竟以銀二萬兩許大將軍年羹堯求薦爲布政使年

夔堯奏聞訊問各犯皆吐實情此乃廉親王有心玷朕之名顯而易見者也廉親王所作罪過宗人府屢次議罪奏聞朕皆寬宥從無罰俸一月降級一次之事案卷俱在歷歷可考朕屢次降旨教諭並不改悔必欲擾亂國政暗使銀錢惑買人心朕不使允禩允禳允禴等過於富厚者爲此故也允禩居心行事如此爾諸大臣定已盡知惟是工部上駟院兩衙門官員人等恐不知廉親王之居心奸詐一墮其術中便爲所累朕豈忍以兩衙門之臣下爲伊所愚弄乎用是再加曉諭非令爾等每事與伊抗拒但令爾等於辦事效力之處一歸於正勿被伊引誘惑亂而已若廉親王允禩果將好官保題朕亦錄用題參者實係不好朕亦治罪如有無知小人受其引誘入其黨與朕必治以重罪後悔無及○甲寅諭工部 陵寢所需物料典禮攸關理應敬謹遵照辦理允禩等議稱

陵寢所用紅土折銀發往彼處採買可省腳價此特允禩存心陰險欲加朕以輕陵工而重財物之名也此議豈可准行所用

紅土著仍在京採買好者運送應用如有不肖官員串通部員不將紅土領運折銀攜往本處採買定行從重治罪○以故輔國公

普照子恆冉襲爵○召范時捷來京調石文焯爲陝西巡撫以法

海爲浙江巡撫

由江南學政遷

○乙卯召劉廷琛來京調黃叔琬爲廣西

布政使以秦國龍爲福建布政使丁士一爲福建按察使

由巡視臺灣

○丁巳諭怡親王等貴州定廣仲苗比他省苗蠻兇頑尤甚朕

向知之前雲貴總督高其倬摺奏請調官兵勦捕朕曾降旨仲苗

向屬兇頑所居之地山深箐密進剿官兵務期擒捕首惡勿致疏

忽茲據高其倬等奏稱進剿惡苗官兵用命攀援而入直抵賊巢

於十月初七十四等日擒獲渠魁阿近暨其弟阿臥及妻子賊黨

等地方從此安靜深爲可嘉高其倬趙坤毛文銓著從優議敘此
內著有勞績官員該督查明造冊報部一併從優議敘效力兵丁
卽加恩賞○辛酉諸王大臣等恭擬 孝莊文皇后 暫安奉殿
爲 昭西陵得旨是○壬戌宗人府奏裕親王保泰自幼蒙 聖
祖撫養內廷又蒙 皇上疊沛隆恩付以重任伊子俱封尊爵乃
不知感戴值 聖祖服制未滿 皇上素服齋居伊在家唱戲爲
樂及承訊問毅然承認反稱於伊母喪事時六年並未唱戲等語
又迎合廉親王允禩昧於君臣大義奏言不遜不忠不孝罪狀昭
然應將保泰革去王爵另與應襲之人承襲得旨保泰著革去親
王○刑部議奏原任四川巡撫蔡珽逼死重慶府知府蔣興仁一
案得旨部議將蔡珽援引應斬之律又減等擬以枷責此特設法
欲寬免蔡珽耳蔡珽果能寬免亦應明白陳奏大臣可殺而不可

尋何得將封疆大吏解京枷責著另議○扎魯特鎮國公蘇里卒遣官致祭○甲子召余甸來京降董永芟爲山東按察使以布蘭

泰爲山東布政使

由戶部郎中遷

○乙丑諭內閣岳周一案牽連多人怡

親王等承審訊問並未加刑於一人而能將其中情弊徹底審出足爲讞獄諸臣標準較之阿爾松阿馬爾齊哈等將無辜之人濫施刑訊者不啻霄壤此所審事情著九卿詹事科道秉公定議具奏尋議岳周妄行鑽營應擬斬立決廉親王允禩以私恩要結匪人應交宗人府嚴加議處得旨岳周改爲應斬秋後處決允禩從前所犯之罪較此重大者甚多朕已俱行寬免著從寬免交宗人府議處○議敘平定青海及擒獲桌子山碁子山番賊功加大將軍年羹堯一等阿思哈尼哈番世職○賞會試武舉下第路費○吏部議覆川陝總督年羹堯等疏延安府屬三十營堡綿亘千餘

里除神木廳所轄東路黃甫川等十營堡應照舊分管外查榆林城堡廳所轄中路十堡內雙山常樂保甯歸德魚河五堡俱環繞榆林鎮城今榆林衛守備千總既裁應將鄜州州同移駐鎮城改爲分駐榆林州同將榆林衛併雙山等五堡地方民事俱交該州同經管其嚮水波羅懷遠三堡以波羅爲適中之地今西安都司經歷既裁應將該經歷改爲葭州州同駐紮波羅爲分駐波羅州同兼管嚮水懷遠二堡又清平威武二堡壤地相接應於威武添設威武巡檢司一員兼管清平堡所有榆林稅課大使應行裁去其稅務歸榆林道兼攝至靖邊廳所轄西路十堡惟靖邊所與定邊爲扼要重地而定邊離鹽場堡二十里鹽販由此出入應設專員巡緝查定邊東有甌井堡西有鹽場宜川邑非繁劇應將宜川縣縣丞移駐定邊爲分駐定邊縣丞兼管甌井鹽場二堡且鹽場

堡原係延屬地方舊設管理鹽務之甯州州同及鹽場大使俱係

慶陽府屬甯州管轄以致呼應不靈應將州同掣回甯州鹽務改

歸靖邊廳就近管轄而令定邊縣丞稽查私販其鹽場大使亦歸

靖邊廳管轄又靖邊東爲鎮羅堡西爲甯塞堡靖邊事繁民眾今

靖邊廳千總旣裁請將延安府經歷司移駐靖邊兼管鎮羅甯塞

二堡再鎮靖一堡路當孔道應添設巡檢司一員爲鎮靖巡檢司

兼管龍州一堡將榆林驛丞事務裁歸城堡廳兼管其安邊柳樹

澗二堡幅員遼闊必得彈壓之員應將甯州州同改爲綏德州州

同移駐安邊兼管柳樹澗堡爲分駐安邊州同歸延安管轄均應

如所請從之○丙寅封阿霸垓台吉德木楚克爲貝子○丁卯馬

喇緣事革職以塞楞額爲刑部右侍郎

由內閣學士遷

○是月免浙江仁

和湖南臨湘湖北沔陽江陵荊州等十九州縣衛被災額賦有差

十二月辛未賜苗國琮等一百三十六人武進士及第出身有差
○實授田文鏡河南巡撫○壬申禮部奏雍正三年元旦令節恭
請 皇上升殿進表行禮得旨朕卽位之初諸王大臣奏請元旦
升殿受賀至再至三朕無可如何准於次年舉行今年元旦升殿
讀表時朕聽之不禁傷感悽然垂淚明歲元旦尙未過二年著停
止行禮○癸酉諭吏部尙書朱軾浙江沿海塘工最爲緊要署撫
石文焯前經奏稱應用石工後又奏稱不必用石全無定見誠恐
貽誤塘工朕已諭令法海佟吉圖作速詳議具奏矣但恐法海等
初任不諳地方情形爾曾爲浙江巡撫必深悉事宜著馳驛前往
浙江作何修築之處會同法海佟吉圖詳查定議交與法海等修
築朕思海塘關繫民生務要工程堅固一勞永逸不可吝惜錢糧
江南海塘亦爲緊要俟浙江議定卽至蘇州會同何天培鄂爾泰

將查勘蘇松塘工如何修築之處亦定議具奏○諭禮部工部國子監進士題名之典始於唐時新進士榜後於慈恩寺塔下題名立碑自宋明以至我朝皆建碑於國學按其甲第先後勒載姓名籍貫於上所以重科名也今太學 聖廟戟門外所立本朝歷科題名碑自順治丙戌科起至康熙戊戌科而止稽之會典諸進士釋菜後禮部題請工部給建碑銀一百兩交與國子監立石題名康熙三年輔政大臣裁省自後每科諸進士各自捐貲立石我國家振興文教凡鄉試會試動用帑金數萬朕卽位之始卽開恩科誠以科目一途實關用人取士之要題名之典豈宜缺焉著工部動用正項錢糧令國子監將雍正癸卯甲辰兩科題名碑速行建立康熙辛丑科亦宜補建嗣後每科仍照舊例題請士子觀覽此碑知讀書登榜之榮益勵其潛修上達之意爾該衙門卽遵諭行

○甲戌諭刑部刑名案件最爲緊要朕所賴者諸大臣之贊襄諸大臣所賴以辦事者各司之盡職是以每司必得一二實心辦事才能之員方有裨益朕思翰林院滿漢編修檢討庶吉士俱係進士出身伊等卽未必素諳律例亦必不難於練習爾等於滿漢編修檢討庶吉士內揀選或有情願在刑部學習辦事者或有爲爾等所知者共揀選二三十員帶領引見分在各司學習辦事明白實心效力者酌量題補○丁丑諭刑部殺人之犯因伊親老家無次丁奏請免死畱養然亦須查明被殺之人有無父母是否獨子若係親老又係獨子一旦被殺以致親老無人贍養而殺人之人反得免死畱養殊與情理未協著行文直省督撫如奏請殺人之犯存畱養親務必將被殺之人有無父母及以次成丁之處一併查明於本內聲明具奏○命登德以侍郎銜在學士裏行走調牛

鈕爲禮部左侍郎以傅鼎爲兵部右侍郎

由副都統遷

○召張楷來京

以常德壽爲江西布政使

由直隸巡道遷

○以桑成鼎爲湖北按察使

由直隸道遷

○安南國王黎維禔遣使賀登極並貢方物○戊寅諭吏部

直隸守道職司通省錢穀巡道職司通省刑名卽如各省之有藩臬二司也今若概與諸道員一體不加分別似未允協蓋向以畿輔重地不立布政按察名色朕思畿輔與各省有何區別今應更改畫一著將守道改爲布政使司巡道改爲按察司前因李維鈞辦事勤慎且能訓練士卒整飭營伍故授爲直隸總督並令提督總兵官聽其節制此係特旨不爲定例將來李維鈞或升任後直隸仍用巡撫一切俱照巡撫舊例卽有授爲總督者亦止照趙宏燮例行不得援李維鈞之例○己卯吏部尙書朱軾奏 皇上至誠大孝居喪三年猶如一日今服制已滿請祫祭 太廟卽吉釋

哀得旨朕覽朱軾所奏當之甚愧朕受 皇考四十餘年顧復深
恩罔極莫報諒陰三年祇以默盡一點私情非爲歷代帝王不能
行之事朕能行之思欲立法定制以垂令名也且如祭祀朝會大
禮不容久曠者朕亦勉徇諸王大臣之請照常舉行惟有齋居素
服悲哀思慕盡一 之誠於宮禁之中古人云禮之至者無文哀
之深者無節朕自嗣統以迄於今撫時生感觸物增悽愴見輿聞
潸然出涕情不容以自禁心不能以自覺遑論其合於古制否乎
昔 世祖 聖祖皆以沖齡登極一時禮制容有未備設 世祖
聖祖踐阼之日已若朕躬之年則盡禮盡制必有朕所萬不能
逮者今朕抱歉之處尙多敢云盡禮乎至所奏三年以來深山窮
谷無不哀思戀慕遇密八音等語此乃 皇考六十餘年深仁厚
澤決髓淪肌四海臣民哀痛迫切感激思慕愈久不忘出於人心

之自然非有所禁約而然也夫以溥海內外凡有知識之倫尙且哀慕不忘如此況朕躬爲子臣欲報昊天罔極之德其終身哀慕復何時能已耶朕之衷曲非欲表暴於人特因奏章過於稱揚朕心滋慚故略爲宣寫以示中外○以羅密爲直隸布政使原任理藩院郎

中浦文焯爲直隸按察使

由河間府遷

○庚辰朝鮮國王李昀謹守藩封竭誠

盡敬恭順事上慈愛撫民深爲可嘉忽聞溘逝朕心不勝軫惻應得卹典著察例議奏○辛巳諸王大臣奏雍正三年元旦恭請

上御殿受賀得旨諸王大臣雖請朕俯順輿情亦當仰體朕意朕以爲與其行慶賀禮以示萬國不若盡孝道以示天下二年元旦因行元年之禮故允所請去年長至行禮因 聖祖仁皇帝配

天大典朕不得已勉從眾請至於元旦御殿進表受賀不比尋常

之御殿謝恩行禮也朕已降諭旨諸王大臣著卽遵行○壬午王大臣奏二阿哥病勢甚篤得旨前看守之王大臣奏聞二阿哥病體朕卽下旨與王大臣於太醫院擇良醫調治昨者少愈二阿哥披誠陳奏感激朕恩殊爲可憫今日醫云病復變重朕欲往看恐二阿哥執爲臣之禮俟有事後朕再往奠前二阿哥福金事旣照親王福金辦理若二阿哥有事亦應照親王之例辦理一切所用之物交與內務府大臣莊親王常明來保等俱於內府取給理郡王所屬人等俱著穿孝卽傳諭令其豫備二阿哥之子孫交與總管太監多派人照看從前 皇考時大阿哥福金曾派在內阿哥穿孝如二阿哥有事著誠親王公允禎長子弘曙弘暉弘曦弘昉弘春弘昂穿孝照親王例齊集時值隆冬福金及大臣之命婦免其齊集著擇定出殯日期送至鄭家莊設棚安厝令伊子弘哲得

盡子道出殯時每翼派領侍衛內大臣各一員散秩大臣各二員侍衛各五十員送至鄭家莊○癸未二阿哥允初薨追封爲和碩理親王諡曰密○甲申諸王大臣等恭聞 皇上有旨往奠二阿哥合詞懇請停止親往得旨王大臣勸朕雖是但朕心不能自己之處爾等尙未盡知二阿哥獲重罪於 皇考其身若在乃係負罪之人今旣薨逝則罪案已畢依然朕之兄也從前裕親王歿時 皇考自熱河回京躬臨致奠朕之弟兄俱著穿孝今封二阿哥爲親王卽與裕親王無異朕登大寶以來於二阿哥處未降一旨未遣一人雖錫賚頻加皆未言及朕所頒賜惟交與總管太監傳送蓋朕心不欲受伊拜謝並不欲聞伊感恩之言也前日聞伊病篤朕遣大臣往視二阿哥奏曰臣蒙皇上種種施恩甚厚臣心實深感激又訓伊子理郡王曰爾若能一心竭誠效力以事君父方

爲令子等語此皆二阿哥至誠由衷之言朕今往奠乃兄弟至情不能自己並非邀譽也明日朕必往奠王大臣不必再奏又諭弘哲之母奉侍二阿哥有年人甚醇謹著封理親王側妃合居伊子府第弘哲盡心孝養理親王侍妾曾有子女者伊子如欲迎養聽其迎養有欲隨側妃居住者亦聽其隨往不願者另給廩舍與居豐其衣食以終餘年著徧諭理親王府下人等知之○乙酉 上詣五龍亭哭奠理親王○丁亥諭兵部爾等所奏廕生內有情願在旗行走六十四人朕從前曾降諭旨給與廕生人員令其分部行走因伊等俱係年少子弟藉祖父效力得一品二品廕生遽授以員外等官儻不能辦事日後必致參革殊非朕加恩之意所以將世職一品二品廕生俱著給與三品廕生考試分給部內學習行走如行走好者著本部大臣具奏仍以原品級補用今此六十

四人既不能學習文藝情願在旗行走伊等皆因祖父世職應得

廕生今既不得用於部員著仍照伊等世職給與原品級廕生於

明年擇日考試○以江苞爲雲南按察使由糧道遷○戊子遣散秩大

臣覺羅舒魯翰林院學士阿克敦賜祭故朝鮮國王李昫諡恪恭

封朝鮮國王世弟李昫爲朝鮮國王○己丑諸王大臣又奏雍正

三年元旦恭請 皇上升殿受賀得旨諸王大臣奏請朕於明歲

元旦升殿受賀朕因未過三年故著停止今諸王大臣又復引經

據典陳懇再三著准行禮其表文但行呈進不必宣讀○禮部奏

請將 皇上潛邸升爲宮殿交與工部會同內務府繪圖呈覽敬

謹營造內閣翰林院撰擬嘉名恭候 欽定從之○庚寅封裕親

王次子保壽之長子廣甯爲裕親王○辛卯封故鎮國公登塞子

鎮國將軍塞爾臣爲輔國公○以賴都爲禮部尙書原任禮部尙書○添

鎮國將軍塞爾臣爲輔國公○以賴都爲禮部尙書原任禮部尙書○添

設湖南提督學政○雲貴總督高其倬奏雲南魯魁山獍賊方景明普有才等擅攻村寨肆行搶掠遣弁兵勦捕擒斬淨盡得旨魯魁獍賊爲害有年該督分遣官兵奮力追勦賊首成擒賊黨根株盡行收捕高其倬及在事有功人員著加恩議敘○是月免江南太倉長洲等三十八州縣水災額賦有差○是歲人丁戶口二千五百五十一萬一百一十五又永不加賦滋生人丁六十萬一千八百三十八田地山蕩畦地八百九十萬六千四百七十五頃二十四畝有奇徵銀三千四十四萬六千六百九十二兩有奇米豆麥四百五十九萬六百一十九石有奇草四百九十二萬二千七百九十八束茶四十九萬五千六百三十六引行鹽五百二萬四千四百九十引徵課銀四百四十二萬六千一百五十五兩有奇鑄錢四十萬九千二百有奇